

AKHBAR : BERNAMA

MUKA SURAT : ONLINE

TARIKH : 19 JUN 2023

HARI : ISNIN

SENTIMEN : POSITIF

தமிழ்

BERNAMA.com

PTPTN PERUNTUK RM120,000 DEKATI MASYARAKAT MELALUI PROGRAM SETULUS KASIH



Pengerusi PTPTN Datuk Norliza Abdul Rahim berkesempatan menyantuni seorang penerima sumbangan semasa sesi walkabout di Flat Kampung Melayu, Pulau Pinang. Photo credit : PTPTN

KUALA LUMPUR, 19 Jun (Bernama) – Perbadanan Tabung Pendidikan Tinggi Nasional (PTPTN) memperuntukkan sumbangan zakat bernilai RM120,000 melalui Program Setulus Kasih PTPTN, sebagai usaha menggalakkan penabungan bagi tujuan pendidikan dan meringankan beban mereka yang memerlukan.

Dalam satu kenyataan PTPTN memaklumkan, sumbangan berkenaan akan disalurkan dalam bentuk akaun Simpan SSPN Prime dan kotak makanan barangan keperluan harian, di beberapa negeri terpilih seluruh negara.

“Secara keseluruhannya, sumbangan ini akan memberi manfaat kepada 600 pelajar dan keluarga asnaf, dengan setiap pelajar dan keluarga akan menerima simpanan akaun Simpan SSPN Prime dan sumbangan kotak makanan berjumlah RM200.

“Bagi memastikan bantuan yang diberikan dinikmati oleh golongan sasaran, program ini turut melibatkan kerjasama dengan agensi Kerajaan, Pertubuhan Bukan Kerajaan dan pemimpin setempat,” menurut kenyataan PTPTN itu.

Pulau Pinang dipilih menjadi lokasi pertama bagi program itu, melibatkan sumbangan berjumlah RM20,000 merangkumi simpanan akaun Simpan SSPN Prime dan kotak makanan, yang masing-masing bernilai RM10,000.

“Diharapkan melalui sumbangan yang diberikan PTPTN ini, dapat membantu meringankan beban hidup golongan yang memerlukan, meningkatkan motivasi anak-anak untuk terus mencipta kejayaan dalam akademik dan sahsiah, sekali gus menjadi modal insan berguna kepada agama, bangsa dan negara.

“PTPTN akan terus komited dalam meningkatkan pelaksanaan program-program CSR (tanggungjawab sosial korporat) demi pembangunan anak bangsa selari dengan moto PTPTN, Peluang Kejayaan Anda dan tagline PTPTN Prihatin: Kami Kongsi, Kami Bantu,” menurut kenyataan itu lagi.

– BERNAMA

<https://www.bernama.com/bm/news.php?id=2199608>